



册府元龟  
卷之二十四  
至六

1 3  
849  
11





門 4 3  
849  
11

冊府元龜

李嗣京叅閱

極文翔鳳訂正

豫章黃國琦較釋

帝王部 二十四

符瑞第三

唐高祖武德元年五月隴州獻嘉麥六月虞州獻嘉  
麥一莖六穗七月京師慶雲見八月永州獻嘉禾異  
畝同穎九月益州上言景雲見十一月藍田玉山南  
嶺有樹連理十二月麟州獻芝草一株紫莖黃蓋是





丹元子集符瑞三  
年新豐鸚鵡谷水清代傳云此水清天下平開黃之  
初暫清尋濁至是復清

二年正月寧州獻白雉壬子麟州獻白鹿二月涪州  
上言李樹連理閏二月沁州上言慶雲見又渝州言  
甘露降三月安昌縣言太行山聖人崖響云唐國興  
治萬年四月有獻李樹連理盤屈如龍六月澤州言  
騶虞見七月益州獻嘉禾一莖六穗九月合州言慶  
雲見又梓州言景雲見十月河州言慶雲見

三年二月鄴州言一角獸見鹿身五色牛尾馬蹄三  
月甘露降於華陰又甘露降於御史臺五月郇州獻  
瑞石有文曰天下萬年七月靈州言白龍見商州言  
白狼見鄴州言麟見

四年二月白狐見玄武門絳州言甘露降肅州獻嘉  
禾一莖五穎四月慶州言慶雲見六月方州言慶雲  
見益州獻芝草如人狀亳州上言老子廟枯樹生枝  
葉

五年正月代州言慶雲見豐州言騶虞見梁州言野  
蠶成繭百姓得而用之

六年西沙州言甘露降彌漫一十五里益州言慶雲  
見管州言麟見



七年陝州獲白石璽一紐章與傳國璽同仁州言騶  
虞見長安古城監渠水生藍色紅白而味甘狀如方  
印遼州獲玄兔萬年縣言甘露降九月丹州言河水  
清

八年四月赤雀巢於殿門宴五品以上上頌者十餘  
人極歡而罷連州言甘露降徧於城廓

九年正月西韓州獻芝草異莖同蓋二月蒲州言河  
水清四月甘露降於中華殿之桐樹凝沍如冰霰以  
示羣臣六月於納義門獲白雀一已卯雅州涇陽縣  
生嘉禾異畝同穎是月益州獻白鹿陝州言白狼見

七月幽州慶雲見海州言鳳凰見於城上羣鳥數百  
隨之東北飛向蒼梧山徐州言慶雲見

太宗以武德九年八月卽位是月丙午宋州言慶雲  
見辛未秦州景雲見雋州言鳳凰見九月雒州赤雀  
見秦州言慶雲見乙未定州言景雲見莒州言鳳凰  
二見羣鳥隨之其聲若八音之奏辛酉利州言慶雲  
見壬戌林州獻禎石隱起成文曰聖主某大吉子孫  
五千歲素質玄字篆隸相參西麟州言麟見十月沂  
州言騶虞見十二月鄭州言玄狐見

貞觀元年閏三月甘露降於長安縣五月豫州言白



丹符元覽符瑞三  
卷之二十四  
狼見十月和州言鸞見

二年三月宜州言白狼見六月長安縣獻嘉禾戊戌  
郭州言白狼見九月甘肅州獻白馬朱鬣十月安州言  
騶虞見

三年四月甘露降於雍州五月癸亥龍見玉女泉乙  
丑幽州言麟見七月宣州言甘露降壬子申州言木  
連理十二月潞州獻嘉禾

四年三月赤雀見於萬年縣

五年二月雋州慶雲見四月甘露降於萬年縣

六年四月楚州言騶虞見癸卯醴泉出丹霄殿之西

命公卿以上示之因置酒於側賜帛各有差

七年二月醴泉湧出於絳州之香溪痼疾者飲之多  
愈

八年四月沂州言白鹿見

九年閏四月衡州言騶虞見五月萬年縣獲白雀戊  
申和州言棠樹連理十月黎州言鳳凰見十一月瀛  
州獻白狼十二月京師蒼鳥見揚州獻白雀是月獲  
麟於德州

十年二月白鹿見於九成宮之冷泉谷三月襄州言  
騶虞見八月維州言鳳凰見



十一月五月麟見京師之後苑九月醴泉出痼疾者服之皆愈

十二年六月滁州言野蠶成繭於山阜九月楚州野蠶成繭徧於山谷濠州廬州獻野繭十月隰州言青龍見管州獻玄狐

十三年正月濟州獻白鹿三月吉辰廐產白馬朱駿八月幽州獻嘉禾一莖九穗

十四年二月陝州言河水變清司空無忌等詣闕上表曰臣聞崑崙載極道玄液以周天積石流源委蒼波而括地俯作神州之紀仰膺上帝之宮水德靈長

斯其謂矣故能道符千載位長百川瑞馬開圖發榮光於遠代應龍闢壤致宅土於遐年自此不追寂寥難俟天之祚聖復在於茲伏惟皇帝陛下則哲承基窮神闡化功緜寓外德耀瀛表文教蔚乎三五至道格乎地天是以禎凝敷澤慶溢風煙丹井輝奇青丘表異嘉苗合穎入豐膳以鳴鐘天駟攝雲播頌聲於綴兆西鷄南雉之貴日至月書連珠湧醴之徵雲飛霧集宜其展事羸里仰告成功出豫介丘方騰茂實猶且宵衣旰食若有追而不逮對越嘉祉乃固辭而弗居遂使萬土韜華三神缺望西皇佇詔申以德水



之祥東岳希封勗以清河之貺伏見陝州刺史房仁  
裕狀稱所管界內二百餘里正月元日黃河載清謹  
案易乾鑿度曰聖人受命河水清京房飛候曰河水  
清天下太平絲是納渭含涇混流同潔凌門洶澤別  
派俱清馬頰馳波詳觀若鏡龍門激箭回眺飛空拍  
天之典煥然馮夷之都可見千尋朗徹俯映玄珠一  
曲澄鮮遙觀紫貝盡河宗之奧秘洞水府之仙靈豈  
非天鑑詳明不愛其道神心昭著在感斯通何幽顯  
合符人祗交際理均形見若斯之效歟臣等沐道醉  
心觀洋駭目披圖逖聽曠古無聞寔慶生涯親承旦

暮詔答曰嘉瑞爰降必資至德大河効祉寔爲希世  
顧惟寡昧但增慙惕乃天地表祥宗社垂祐欲使四  
海隆平八荒禔福王公卿士內外庶僚宜勉修正道  
以副靈貺焉三月秦州言河清七月白龍見於富平  
九月杭州言青龍見

十五年二月開州言白龍見三月肅州言所部川原  
遍生芝草四月慶州言騶虞見冀州獻白狼五月癸  
未廬山府獻白鹿乙酉安禮門御榻產芝草五莖六  
月滁州言青龍見庚子商州言慶雲見七月洪州獻  
玄珪滄州言青龍見丁亥靈州言景雲見八月嘉州



撫州各言慶雲見衡州言白鹿見九月滄州言龍見十一月幽州言五色雲見

十六年正月宣州言慶雲見七月朔鄜州言白龍見温州各言景雲見八月申州獻白雉九月金州言青龍見十月滑州獻白狼十一月箕州言景雲見湖州言慶雲見十二月宋州言青龍見

十七年三月杭州言木連理二十四株有植黎二木合爲一體有雄雉飛集東宮顯德殿前太宗問羣臣曰頃來頻有雉集是何祥也諫議大夫褚遂良曰昔秦文時有童子化爲雉雌者鳴於陳倉雄者鳴於南

陽童子言曰得雄者王得雌者霸文公遂以爲寶雞祠漢光武得雄遂起南陽而有四海陛下舊封秦王故雄雌見於秦地旣古來將爲祥貺所以彰表明德太宗曰立身之道不可無學遂良所對深爲可重五月雍州獻三足鳥己未湖州言甘露降潤州言慶雲見華平出於玄武門之池懷州獻白狼湖州言慶雲見閏六月柳州言慶雲見丹州獻白鹿七月鄜州言景雲見辛卯嘗州言青龍見八月涼州言昌松縣鴻池谷有石青質白章爲文曰高皇海出多子李九王八千太平天子李世民王千年太子李治書燕山人



士樂大國主尚汪諤樊文仁道千古天王五王六王  
七王十王鳳毛才子七佛八菩薩及上果佛佛田天  
子文武貞觀昌大聖延四方上下萬里忠者仙戈八  
為善

九月魏州言慶雲見皇太子寢室產紫芝二十四莖  
竝為龍與鳳翥之形十一月并永滁州景雲見鄭州  
河水清懷州河水清永州言慶雲見廓州獻白狐  
十八年正月嘉州言青龍見台州言甘露降雋州言  
慶雲見四月豫州言白龍見五月鄆州獻白狼六月  
辛亥鄭王府獻白狐瀛州言慶雲見七月會州言青

龍見朗州言青龍見壬午滁州言景雲見八月商宋  
蘭鄧雒五州言景雲見曹雒二州言景雲見趙州獻  
白鹿九月汝州言青龍見十月潞州言慶雲見山南  
獻木連理交錯玲瓏有同羅目一丈之餘并枝者二  
十餘所十一月湖州言慶雲見  
十九年二月岳州獻毛龜二滁州言騶虞見十月老  
人星見十一月費州言慶雲見渠州言青龍見  
二十年正月汝州言甘露降二月潮州言慶雲見戊  
午許州獲白狼二月德州言景雲見鄆州言一角獸  
見景戌冀州景雲見四月房州言赤雀見五月襄州



言慶雲見景申澤州言甘露降七月安州言白龍及慶雲見穀州言景雲見八月老人星見九月澤州言白鹿見十月亳州言甘露降十一月雍州言甘樹一株有十八處連理李樹生芝英赤紫莖光色鮮麗陝州言青石理成文曰李君王三字汾州言青龍白龍見白龍吐物初在空中有光如火至地陷入二尺掘之則玄金之形團斜廣高六七寸疊州言五色雲見兗州言青龍見

二十一年四月兗州鸞見易州言慶雲見六月始州言景雲見淄州言鳳凰見壬申亳宋二州各言慶雲

見白龍見於鄆州懷荆二州言景雲見辛酉趙州言慶雲見七月懷襄同鳳瀘宋亳蓬綏等州言慶雲見鄆州言白龍見八月綏州言慶雲見九月崖州言白龍見岷州言慶雲見老人星見開州言景雲見十月南代州騶虞見戊戌綏州言景雲見

二十二年正月玉華宮李樹連理隔澗合枝二月懷州河水清原州言景雲見六月洮州言白龍見循州言景雲見七月襄州言慶雲屢見定襄都督府言慶雲見八月昭州洪州言慶雲見九月晉州言慶雲見巴州沂州皆言慶雲見遂州涪水中獲古鼎受五石



三斗旁有銘刻取初風雨晦冥響若洪鐘十二月絳  
 綿代潞五州並言慶雲見閏十二月朗州言慶雲見  
 二十二年三月代州言慶雲見四月壬申靈州言河  
 水清  
 高宗永徽五年六月濟州言黃河清一十六里皎然  
 澄徹是歲大稔雒州米斛至兩錢半粳米斗至十一  
 文  
 顯慶元年二月岐州獻一角獸五月岐州五龍見於  
 皇后泉

龍朔元年二月益縣等五州皆言龍見

於是六月充  
改元

州青龍三十九見

三年十二月詔以絳州麟見于介山舍元殿前琅臺  
 閣內竝觀麟跡改來年正月為麟德元年在京及雍  
 州諸縣見繫囚徒各降一等杖罪以下竝免之

上元三年十一月陳州上言鳳凰見宛丘縣

睿宗唐隆元年六月甲辰即位大赦天下是日慶雲  
 見于東方丙午楊州上言慶雲白雉見七月巳巳冊  
 玄宗為皇太子是日有景雲之慶改元為景雲元年  
 景雲二年六月雒州上言兩岐麥八月以高祖舊宅  
 有柿樹天授中已經枯死至是重生因而大赦天下



十月寧州嘉禾異畝同穎江州上言神泉湧十二月  
光州上言李樹連理

三年正月有事於南郊是日佳氣四塞

太極元年五月戊寅睿宗有事於北郊是日東南有

紫氣扶日上

延和元年六月涼州上言赤雀見

玄宗先天二年八月江州獻靈龜六眸腹下有玄文

象卦文懷州上言有嘉禾四穗十月有事於太廟是

日慶雲見

開元元年十二月有麟見於峽州遠安縣之鬼谷仙

洞

二年正月丙寅涼州獻朱驥尾白馬庚午原州獻肉

角羊八月太子賓客薛謙光獻東都九鼎銘其豫州

鼎銘武后所製文曰羲農首出軒昊膺期唐虞繼踵

湯禹乘時天下光宅域內雍熙上玄降祉方建隆基

宰相姚崇盧懷慎等奏曰聖人啓運休兆必彰故化

馬爲龍預流謠頌秀爲天子早著冥符臣等今見薛

謙光所獻東都鼎銘大聖天后所製其文云上玄降

祉方建隆基豫州處天地之中所以遠包四海銘文

獨聖后所製固必先感二儀靈慶昭彰曠絕今古臣



等忝陪近侍喜萬嘗情請宣付史官并頒示内外許

七年閏七月虢州奏閩鄉縣桃林鄉醴泉湧出楊州  
奏楊子縣一角獸見八月老人星見其色黃明而大  
八年正月甘露降五月德州奏平原縣麥一莖兩岐  
分秀八月老人星見十二月隰州慶雲見壁州甘露  
降齊州嘉禾生鄂州芝草生徐州獲白野鷄岐州獲  
白鷺進之

九年二月汝州奏魯山縣之堯山有白鵲見于許昌  
縣之唐祠掘地得古銅罇上又隱起雙鯉篆書文曰  
宜子孫竝請宣付史官從之五月絳州奏正平太守  
而縣瑞麥七莖兩穗一莖四穗十月洪州慶雲見十  
一月蘄州奏蘭溪縣芝草生

十一年正月行幸北都紀功於太原府之南街有連  
理李樹連理其宗生于太原縣二月祠后土于汾陽  
之睢土太史奏榮光出河休氣四塞徘徊遶壇日揚  
其光有司奏脩壇掘地獲古銅鼎二其大者容一斗  
色皆青又獲古甌長九寸上有篆書千秋萬歲及長  
樂未央字又有赤兔見于壇側十一月癸酉日長至  
太史奏日平明陰雲祁寒及其日出有雲迎日又有



祥風至涇東日出有黃白冠及日南有珥臣謹按黃帝占云冬至之日陰雲祁寒來歲大稔人安五穀豐熟又曰風不及地和緩而來謂之祥風王者德至於天則祥風起日冠且珥人主有嘉並太平之嘉應臣請宣付所司許之

十二年五月濬州慶雲見太原獻異馬駒其耳如筒左右各一十六肋肉尾無毛六月景申光州五色雲見乙巳河南府之告成縣王利文家瑞麥生穗分歧一莖三秀利文上表曰陛下往在藩邸扈從三陽在臣宅上休憇臣宅北坂之下陛下以爲毬場自夏徂

秋往來遊賞其地因感聖氣今有瑞麥生苗或六穗分榮或一莖數秀方圓縱橫不離場邊自非至德潛通豈有瑞應若此詔賜利文絹三十疋遣之十月合州慶雲見閏十一月豫州言白麋見

十三年五月甲申瑞麥生于河南府之壽安縣勸農使宇文融上表稱賀甲午潞州白鹿見戊戌以親製西嶽碑示百寮有五色雲見於前巳亥代州甘露降九月兗州奏白雀見十月丁卯太史奏白雀見壬申萬年人王慶築垣掘地獲寶鼎五獻之四鼎皆有銘銘曰垂作尊鼎萬福無疆子孫永寶丁丑白鵲見於



行宮十一月丙戌封禪至泰山之下戊子有雄野雞  
飛入齋宮馴而不去久之飛入仗衛忽不見邠王守  
禮等賀曰臣謹按舊典雌來者霸雄來者王又聖誕  
酉年雞主於酉斯蓋王道遐祚天命休禎請宣付史  
官以彰靈貺從之己丑日南至上備法駕登山至齋  
室其夕陰霧慘烈勁風四起裂幕折柱寒氣切骨上  
露立祈請仰天自誓曰某身有過請即降罰萬人無  
福亦請某為當罪應時風雨止天地清晏日氣和煦  
及升壇休氣四塞登歌奏樂有祥風自南而至絲竹  
之聲飄若天外及禪社首五色雲見日重輪及還山

下之齋宮有慶雲隨馬祥風遠路時中書令張說等

以薄德恭膺大寶雲物休洽皆是輔弼之力君臣相  
保勉副天心長如今日不敢矜息說等又奏曰聖心  
誠懇昨夜齋居則息風及雨今朝封祀則天清日暖  
復有祥風助樂卿雲引燎靈迹盛事自古未聞陛下  
又思慎終如初長  
福萬姓天下幸甚

十四年八月梓州言慶雲見通州言芝草生  
九年晉州神山縣玄元皇帝廟根子樹兩枝連理合  
成一枝十月己巳帝至自汝州之温湯時有五色鸚  
鵡能言育于宮中帝令左右試牽御衣鳥輒瞋目叱  
咤岐王文學能延景因獻鸚鵡篇以贊其事帝以鳥  
及延景詩示百寮尚書左丞相張說上表賀曰伏見



大恩以靈異鸚鵡及能延景所述篇出示朝列臣按  
南海異物志有時樂鳥鳴皆曰天下太平有道則見  
臣驗其圖丹首紅臆朱冠綠翼與此鸚鵡無異而心  
聰性辨護主報恩故非嘗品凡禽實瑞經所謂樂鳥  
也延景雖識其事未正其名望編國史以彰聖瑞許  
之十二月丙午越州言李樹連理癸丑邢州申州各  
言慶雲見

十五年四月彭州言白兔見八月壬寅海州白麋見  
丁丑資州言慶雲見閏九月億歲殿生芝草一葶十  
月汝州言嘉禾生簡州言慶雲見

十六年三月京兆府三原縣浪井出七月慶雲見于  
仙州葉縣十一月日南至帝御含元殿受朝賀太史  
奏黃雲扶日請付有司從之

十七年五月庚寅有靈芝草產于太廟第九室殿柱  
甲寅有赤雀見于冀州一雄一雌六月有浪井出梓  
州十月睦州獻竹實

十八年四月辛酉壽州獻白雀甲午嘉州奏楠木生  
連理枝廣州獻紅鸚鵡五月辛丑徐州奏慶雲見甲  
辰陝州奏靈芝產六月甲申沁州奏月抱瑞彩揚光  
五色乙酉鄂州奏景雲見



十九年二月癸未皇太子鴻等奏曰昨正月二十七日伏見陛下於興慶宮親耕三百餘步旣而青光紫氣覆地四月己卯楊州奏櫓生稻二百一十頃再熟稻一千八百頃其粒與嘗稻無異壬辰河南府登封縣唐村李嗣谷當陽山南面石文舊有帝字新生上字識者以爲聖明之應河南尹孟溫禮奏賀六月癸未浪井出於邛州之龍興觀之平地泛溢五色相輝浮彩彪炳壬申芝草生於京城之勝業寺一本七莖心黃外紫八月辛巳上降誕之日有黃雲三道於西方九月乙未冀州任丘縣孝悌鄉嘉禾生庚申婺州永康縣嘉禾生一莖五穗神羊產于京兆之興平縣

二十年三月有一角獸肉角當頂白毛上捧識者以爲獬豸

二十一年二月衢州獲魚有銘獻之侍中裴光庭等奉賀六月庚子眉州獻寶鼎重七百斤無耳足有篆文數字時渝州刺史段懷本奏此鼎到陳州界之對溪驛雲霧暗合有白虹逼鼎臣恐淪失不勝驚懼請至合州取陸路至京許之癸丑蓬州奏枯樹上生李枝結實絳州奏龍興觀池同心蓮一莖八月癸亥沂



州產紫芝三莖是夜五更二籌後南方景上老人星見其色黃白太史奏曰臣謹按春秋文曜鉤云王者安靜則老人星臨其國主壽昌萬人安常以秋分節候之南郊今應期而見請付所司從之

二十一年五月河州慶雲見八月幽州奏千秋節日有慶雲見於夷軍又軒轅皇帝廟中古井湧浪泛溢又安次縣百姓家產連理樹及大麥一本一十八莖穗秀兩岐十月尚書左丞相蕭嵩率百寮奏曰伏見所司奏今年祥瑞祥風起日抱戴嘉禾秀芝草生甘露降醴泉湧木連理瓜同蒂竹再生李成實馴鳩玄

鶴慈烏鵲鴿寶鼎魚銘錢刀甄字等二十有一事臣聞惟德感神惟祥祚聖有欲之而莫致或不召而自彰蓋所謂天之輔人福之先見者也伏惟開元神武皇帝陛下狗齊敦敏欽明光宅三靈以泰百度惟貞故感應日聞珍符歲積蓋祥風者昭乎號令抱戴者表以納忠嘉禾主於同文芝草明於敬老甘露洒神靈之液醴泉發德澤之滋草木秀其地靈羽毛呈其天瑞其餘山川異氣器用殊姿舉而必然不可勝紀斯竝玄天幽贊黃靈合德非大聖不能降其祥非太平不能當其應請宣付史官傳于後代上手詔報曰



虔奉宗社昭事天地幸蒙垂祐降此禎祥豈自厥中以彰其外歸之于朕是用多慚宣付史官依卿所請二十三年二月丁未絳州白鹿見已酉安州慶雲見五月丁卯藍州有浪井出及醴泉滂湧癸未晉州慶雲見六月丙戌文州慶雲見壬子京兆富平縣瑞大麥生一莖五穗華州下邽縣瑞大麥生一莖三穗京畿採訪使御史中丞盧奐奏賀八月幽州長史張守珪奏榆關內有蚘蝗蟲食田稼蔓延入平州界俄頃有羣雀來食此蟲一日食盡平州稼穡無有傷者九月乙丑楚州慶雲見十月沂州芝草生一莖九寸十

岐乙未京兆府奏蓋屋縣嘉禾生戊申楊州奏獲毛龜其色青庚戌朔州奏甘露降嘉禾生十一月楚州陵州會州並言慶雲見沂州密州皆奏芝草生十二月龍池聖德頌石自鳴其音清遠有如鐘聲百官等上表稱賀

二十四年三月獲瑞獸首耳形類虎尾長於身有豹文能食虎七月辛巳沂州慶雲見瑞麥生壬午台州鄆州並言慶雲見乙酉荊州萬州並言慶雲見八月戊申嘗州有神龜見綠毛黃甲庚戌老人星見黃色明靜而大太史奏曰臣謹按春秋文耀鉤王者安靜



則老人星見孫氏應瑞圖云王者承天則老人星見  
臨其國又黃帝占云老人一名壽星色黃明大則主  
壽昌天下多賢士伏惟陛下以千秋節祀于星壇  
而祭期將臨美應先至知曆數之方永嘉萬壽之昌  
期請付史官以光典策許之

二十五年四月丁卯幽州慶雲見五月丁丑白鵲見  
戊寅河清八月丁未千秋節宴羣臣於勤政樓下太  
史奏曰今日卯時有祥雲出東方及其樂作非煙燭  
於西北巳午之時日有抱戴伏以陛下聖曆方永福  
履無疆游臻嘉瑞之符載洽繞樞之日臣等不勝忭

躍請宣付史館許之十月庚申宰臣李林甫牛仙客  
祭南北郊有瑞氣縈壇祥風拂地太史奏今日陛下  
虔報豐稔昭祭神祇臣謹候天地清謐星辰明朗初  
祭則樽俎適陳祥風拂地既奠之後瑞氣縈壇其風  
則暢和緩之候其氣乃蓄龍鳳之色臣謹按王者德  
至於天則祥風起又堯沈璧於河休氣四塞伏惟陛  
下一德馭物而天祥薦祉盡皇王之靈貺躋蒼生於  
仁壽請宣付所司編入史冊許之十一月青州奏日  
光五色十二月泗州奏日抱戴

二十七年七月巳卯蒲州刺史韓朝宗奏新置靈貞



州元龜 符瑞三 卷之二十四  
觀有慶雲見連理樹生壬午河西隴右節度使蕭炤  
討吐蕃大破之有慶雲見於陣前白兔舞於營中請  
編史冊許之

二十八年陝州青州皆言慶雲見四月庚辰有慈烏  
巢于紫宸殿之拱侍中牛仙客中書令李林甫上表  
賀曰臣等伏因侍奉之際天恩令臣升殿觀此烏巢  
陛下孝弟之至通於神明仁慈所育豈獨黎庶故得  
上玄協應靈鳥呈瑞翱翔不離於廷際栖集必歸於  
軒檻或人俗所有但止於園林今聖感而來乃巢於  
殿拱依人無懼戀主愈馴博考圖籍未之有也臣等

幸忝樞近親睹休祥望頒示中外以彰靈感手詔報  
曰所聞不如所見故引卿等觀之頒示寰中俯依來  
請辛巳又有慈烏巢於宣政殿之拱仙客林甫又上  
表賀曰陛下孝友因心慈仁被物故得上帝儲祉靈  
鳥發祥高棟重櫺共瞻爰止前軒內殿皆親來巢視  
之彌馴逼之不懼休祐重沓而交應徵求古今而未  
聞臣等何人屢觀嘉瑞望與前狀同宣中外克紀禎  
符手詔報曰兩殿巢禽其義一也但有慙德深謝仁  
慈頒示四方隨卿所請

二十九年正月亳州刺史鄭愿奏玄元皇帝廟中之



井涌氣成雲五色相映三月甲申滑州刺史李邕獻馬一匹表云其馬肉鬃鱗臆嘶不類馬聲日三百里邕任淄青刺史日遇一老翁云聖主將得龍馬以應太平邕遂於青州馬會思家獲而獻之己丑亳州奏老君廟九井先涸自奉詔增修觀宇九泉皆湧及樹已枯復榮四月甲寅深州奏連理甘棠樹生于陸澤縣甲戌温州奏日抱戴揚光五色五月戊午有白雀白鳥見於原州之平原戊寅有慶雲見於亳州真源縣之玄元皇帝廟兼有白鵲翔于廟門樓六月耳露降於司農寺八月命有司於興唐觀設齋自內迎玄

元皇帝真容于觀宰臣已下百官悉行香有慶雲見天寶元年正月戊申安西都護田仁畹於于闐東王河獲瑞玉龜一畫以獻癸丑太史上言今旦卯時日有紅碧黃氣數見及紫赤雲氣潤澤鮮明在日上謹按瑞應圖名曰慶雲太平之應請編入史冊許之六月壬辰信都瑞麥生臨州郡人李嘉喬所居柱上芝草生形類尊容屢陳光彩太守張景佚拔柱獻之乙未隴右節度皇甫惟明奏龍支縣人庠狄孝義有馬生龍駒經九旬有九日身有鱗而不生毛臣就簡視時有慶雲五色遙覆馬上久而不散伏望宣付史官



以光寶錄從之睢陽郡嘉麥生一莖八十一穗八月  
乙酉老人星見

二年三月南郡奏所部紫極宮有慶雲見

三載三月癸酉興慶宮合鍊院芝草生一本六莖丙  
子武威郡上言番禾縣之天寶山有醴泉湧出嶺石  
化爲瑞麵遠近貧乏者取以給食五月京兆尹奏所  
部芝草生

四載八月戊子有班鹿產白鹿于苑中獻之請宣付  
史館上曰宮苑之內屢薦嘉祥今又縞質霜毛變林  
虞之獸族殊姿馴性實雲駕之龍媒允謂休徵用爲

慰也所請者依癸巳京兆之新豐嘉禾生或九穗六  
穗九月河南府登封縣嘉禾生一本十二穗

五載五月乙卯河東郡太守李知柔奏乘泉縣潘水  
修功德處有白魚引舟五色雲起望宣付史館從之  
丙戌鄴陽郡上言甘露降於所部紫極宮之松樹絳  
郡上言姑射山修功德處有慶雲捧日七月汝陰郡  
上言有嘉麥生一莖兩岐

七載三月有玉芝生於大同殿之柱礎一本兩莖神  
光炤於殿上命文武百寮入觀之  
八載六月大同殿又產芝一莖



九載二月甲戌獻陵昭陵乾陵定陵橋陵等五陵栢樹盡垂甘露壬寅華陰郡奏白鶴見於西嶽五福峯甘露降大羅峯之醮壇白鹿見于大羅東南峰駕鶴嶺衛叔卿之得仙處請付史館從之

七載七月有鹿產白麝于閑廡之試馬殿八月癸丑黔中郡紫極宮慶雲見甲寅上雒陽慶雲見丁巳丹陽郡茅山鍊丹院生芝草一莖庚午蘄春郡之天長觀聖容玉石蓮花座上生紫芝一本七莖九月壬午夜太史奏壽星見於景上大明色黃十月乙丑御朝元閣有慶雲見上賦詩羣臣畢和癸酉丹陽郡茅山

慶雲見白鶴羣飛十一月長至太史奏北方有黑雲氣四方俱有薄黃雲佳氣濃厚又有黃氣扶日十二月餘杭郡慶雲見化樓閣勢兼有仙人形象乙卯彭城郡有慶雲見

十四載三月南道觀察使源涓奏江陵郡古紀城東南招討使康令謙及同行軍將等同見臣謹畫圖奉獻伏望宣示中外編諸史冊從之四月劔南道獲白兔一獻之八月癸巳老人星見巳亥中書省五色雲見庚子樂安郡上言嘉禾及獲白鵲白雀壬寅京兆



府奏嘉禾生而獻之癸卯東平太守嗣吳王祗奏所  
部壽張順昌兩縣鹹穀櫓生丙辰蜀郡奏慶雲九見  
十月廬江郡人王恭家有李樹連理結紫實癸酉幸  
華清宮有石產玉芝宰相楊國忠請宣付示朝廷編  
諸史冊從之

十五載六月玄宗幸蜀七月壬戌至益昌郡濟州於  
吉伯渡有雙白魚夾御舟而躍識者謂之兩隻飛龍  
焉

冊府元龜

冊府元龜

淮南李嗣京參閱  
西極文翔鳳訂正  
豫章黃國琦較釋

帝王部 二十五

符瑞第四

唐肅宗以天寶十五載七月卽位于靈武改元至德  
是年九月二日帝降誕之辰有慶雲屬天白鶴飛舞  
於上所居殿宇翺翔二十餘匝而去十一月辛未長  
安雲氣如衣冠備具太史奏天下和平之象



二年七月朔方節度郭子儀奏寧朔縣界荒地廣十五里有黑禾穀出遍地每日側近百姓掃盡經宿還生前後可得五六千石其禾圓實味甘美臣以爲天啓興王瑞先百穀故漢稱雨粟周頌來麩豈瑞禾自出家給人足蓋陛下富教安人務豐敦本光復社稷康濟黎元之應也臣不勝大慶八月乙未太史奏其日老人星見光潤明澤十二月癸亥帝受國璽太清宮晨有紫雲見從殿東南角稍至殿前

乾元元年四月甲寅帝親行享廟禮并祭昊天上帝禮畢有景雲見於日之南自卯及辰久而方散有頃朔方告破賊已未懷州刺史王奇光奏河內縣王昇清種麥數畝皆一莖三穗丁卯太廟殿院北門內柱生芝草兩莖紫蓋七月庚寅朔方節度使郭子儀奏東京上陽西金華門外仗舍下見白鼠穴穿之得天子信寶一枚皆篆書背上雕刻青龍白虎朱雀玄武相盤以爲帝德廣運乾道降祥璿圖永昌坤維耀寶請宣示朝廷詔曰我國家卜代悠久歷數無疆明神降休靈貺斯格昌符兆發寶印呈祥皇帝之徽號旣彰天子之鴻名又信斯寶累聖致感上玄垂裕豈朕薄德所敢當仁卿國之大臣獲斯嘉瑞光我盛禮何



慶如之

三年五月嵐州上言合河關黃河水四十里間清如井水經四日而變十一月景寅左金吾衛大將軍王晟奏明鳳門有慶雲自欄杆上起盤旋紛郁光彩明耀門官皆覩焉

上元二年七月甲辰延英殿御座生玉芝一莖三花御製玉靈芝詩三章八句八月戊辰夜老人星見其色黃明潤澤而大

元年建子月戊戌冬至有雲迎日日揚光司天監韓穎奏謹按春秋感精符南至有雲迎日年豐之象建

巳月壬子楚州刺史崔旆表獻定國寶玉十三枚一曰玄黃符如笏長八寸上圓下方近圓有孔黃玉也二曰玉鷄毛文悉備白玉也三曰穀璧白玉也徑可五六寸其文粟粒無雕鑄之迹四曰西王母白環二枚白玉也徑六七寸六曰如意寶珠形圓如鷄卵光如皎月七曰靺鞨大如巨粟赤如櫻桃八曰琅玕珠二枚長一寸六分十曰玉玦形如玉環四分缺一十一曰玉卽大如半手斜長理如鹿形陷入卽中以卽物則鹿形著焉十二曰皇后採桑鉤長五六寸細如筋屈其末似金又似銀十三曰雷公石斧長四寸濶



二寸無孔細緻如青玉十三寶置于日中皆白氣連天  
天旻表云楚州寺尼真如者恍惚上昇見天帝授以  
十三寶白中國有災宜以第二寶鎮之中書門下表  
賀詔曰太寶禎符時膺昌運皇天不秘紫府降靈敷  
上帝之耿光悟神祇之有鑒荷斯戩穀弘濟艱難冀  
與兆人同登壽域股肱奉上宗廟福予豈唯朕躬致  
此嘉瑞卿咸有德寅奉休徵將使發揮克諧輔弼  
所請宣示中外編入史冊者依乙丑詔元年宜改爲  
寶應元年其楚州刺史并出寶縣官及進寶官量與  
進改隨進寶官典儉等各量與一子官宣示中外宜

知朕意

代宗寶應元年四月己巳卽位其日有慶雲見初帝  
至飛龍廡座前有紫雲見雲中有三白鶴徊翔又有  
喜鵲鳴及將卽位仗衛宿設夜分雲霧四合不辨咫尺  
旣曉朝呼萬歲天地清朗非煙滿空黃氣抱日咸  
以爲聖感甲戌潞州獲赤雀獻之五月商州上言慶  
雲見七月己卯京兆府萬年縣獲三足烏獻之九月  
戊辰陝州上言黃河清是夜老人星見黃明潤澤司  
天少監瞿曇謨奏曰臣謹按春秋元命苞云老人星  
明則人主壽昌國多賢士常以秋分候於南郊所見



合秋分之氣當天地之中伏望編諸史冊宣示朝廷  
從之甲午太州至陝州黃河清二百餘里澄澈見底  
戊戌太州嘉禾生異畝同穎獻之出示百寮

廣德二年五月巳酉河南府上言河陽縣界黃河清  
踰月不變十一月鎮南副都護甯齡先言合浦縣海  
內珠池自天寶元年以來官吏無政珠逃不見二十  
年間闕於進奉今年二月十五日珠還舊浦臣按南  
越志云國步清合浦珠生此實國家寶瑞其地元勅  
封禁臣請採進許之

永泰元年七月甲寅有三白鹿一白兔見于禁苑觀

軍容使魚朝恩受命巡苑內屯田因獲之以獻朝恩  
上言請付史館編諸簡策手詔答曰白鹿白兔王者  
嘉瑞和平之應朕以寡德詎敢當焉卿及將士等務  
切軍儲克勤農畝上玄眷祐爰獲禎符所請付史館  
者依是月庚申京兆府上言鄂縣嘉禾生穗長一尺  
餘穗上粒生重叠如連珠八月戊子司天臺上言老  
人星見

二年六月丁未是夜月重輪八月巳酉秋分老人星  
見於景上黃潤明大十一月乾陵赤兔見獲而獻之  
大曆二年三月丁巳河中府獲玄狐獻之出下百寮



八月庚子夜老人星見其色黃明而大十月己卯右羽林軍獲白雀獻之乙酉有醴泉出於京兆府之櫟陽飲者多愈痼疾己亥潞州長子縣嘉禾生而莖同穗十一月己巳長至司天奏曰日色清明祥風四起請付所司從之

三年正月晉州獲白雀獻之四月乾陵上仙觀三尊殿有兩雀銜柴及泥補葺殿之隙壤凡一十五處閏六月楊州上言和州歷陽縣有三鳥同巢七月汴州獲白雀獻之閩州新井縣連理瓜生九月宣州獲白鼠三獻之十月太原府上言五色雲見及嘉禾生

四年正月乙亥大雪平地盈尺百寮於宣政殿拜舞稱慶前年冬少雪故也三月潤州上元縣產芝草一莖四葉高七寸六月慶雲見於西郊

五年四月癸巳廣州越州竝言慶雲見丁未台州言慶雲見五月己巳石州上言五色雲見

六年七月己丑華州言甘露降道州上言五色雲見八月戊辰楚州上言芝草產于淮陰縣是夜老人星見其色黃明而大丁丑白兔見于太極殿之內廊獲之出示百寮九月丁酉沂州上言慶雲見十一月澶州上言長沙縣榮唐里樹下有瓜生同蒂連心永州



上言湘源縣芝草生同根三莖合成一蓋十二月癸酉婺州上言嘉禾生一莖九穗一莖十二穗七年五月甲申亳州獲白雀六月丁亥蔡州言慶雲見是歲大稔

八年四月壬申潞州上言玄宗十九瑞閣有白鶴來翔五月丁丑鳳翔府上言天興縣嘉禾生一莖二穗六月戊申梁州獲白雀二獻之庚辰廬州上言廬江縣紫芝草生一根兩莖一丈五尺又合肥縣棠梨樹上烏鵲同巢七月丙戌東都留守蔣渙上言太廟殿柱生芝草二莖太原府上言清源縣人韓景輝養冬

蠶成繭詔給復終身甲午蔡州獲白鵲一獻之癸

上言金華縣李樹連理乙未蓬萊池獲毛龜出示察戊戌內侍省獲白鼠一出示百寮壬寅神策軍上言金天門外水渠中獲綠毛元龜獻之八月壬戌太原獲白鳥一白鵲一獻之庚寅亳州獲白鹿一白野雞一獻之滑州言靈昌縣連理瓜生及瑞麥一莖三穗九月丁丑京兆府上言梨樹及林檎樹並連理戊寅桂州上言芝草生是夜老人星見辛巳華州上言嘉禾生十月丁未襄州言芝草生庚戌揚州上言芝草生丁卯鳳翔府獲白鼠獻之太原府上言嘉禾生



十一月鳳翔府上言天興縣禾生一莖三穗太原府  
上言壽陽縣嘉禾生兩莖同穗閏十一月丁未申州  
上言義陽縣芝草生乙丑衢州上言龍丘縣李樹上  
產芝草五莖成都府上言甘露降是月景子澤州上  
言嘉禾生是歲大有年

九年二月庚午鄭州上言李樹上生芝草一莖三月  
癸卯亳州上言芝草生京兆府獲白鵠一獻之四月  
庚戌汝州上言甘露降甲午隴州獲白鵠一獻之五  
月丁巳隴州獲白鵠獻之京兆府上言瑞麥生九莖  
同穎七月丁酉廬州獲白鼠二舒州獲白雀一並獻

之九月戊申晉州上言神仙縣慶唐觀栢葉松身樹  
已枯再生十月己巳申州上言芝草生辛卯鳳翔府  
上言嘉禾生一莖兩穗十一月癸亥福州獲白鷺二  
獻之十二月戊寅寧州上言嘉禾生衡州上言李樹  
上芝草生莖連樹根丁亥婺州上言慶雲見  
十年正月壬寅冀州上言嘉禾生五莖生合爲一莖  
乙巳處州上言李樹連理二月壬申江陵府上言芝  
草生壬午處州上言芝草生三月濠州上言芝草生  
鳳翔府獲白雀一獻之五月蜀州上言唐興縣李樹  
上芝草生三莖漢州上言李樹上芝草生一莖七月



癸酉絳州上言芝草生八月巳酉夜老人星見九月  
乙卯太原府上言嘉禾生

十一年九月庚辰夜老人星見

十二年正月乙丑渭北行營所獲赤雀二獻之壬申  
嘗州上言甘露降潔白凝滋味同飴蜜五月甲子成  
都府人郭遠因樵爨獲瑞禾一莖有文曰天下太平  
四字獻之以示百寮宰臣等奏賀曰頃者賊臣兇狡  
敢蔽聰明陛下以時發覺成就誅放與人更始在物  
維新浹辰之間果獲佳應至德之化光賁草本太平  
之時遂形文字伏望藏於秘閣宣付史館從之六月

癸未苑內獲白鼠一出示百寮九月戊午夜老人星

見十月乙酉潭州上言慶雲見甲午陸州上言桐廬

縣五色雲見十一月巳酉蔡州上言汝陽縣芝草生

紫莖黃蓋辛亥京兆府上言甘露降於城內靖恭坊

之南街柳樹味如飴蜜十二月河中府上言臨晉縣

嘉禾生四莖二穗

德宗建中四年五月滑州濮州黃河清

興元元年八月宋毫觀察使奏亳州貞元縣大空寺

僧院李樹植來十四年長一丈八尺今春枝上忽聳

高六尺周回似蓋九尺餘又先天觀玄元皇帝太后



陵槐樹上有靈泉湧出六月忽有靈氣五色見於泉

上

貞元元年十一月京兆府奏有人於長興坊得玉璽  
文曰天子信璽中書門下表賀請付所司制曰可

三年閏五月陝虢觀察使李泌獻瑞麥一莖五穗七

月京兆府獻嘉禾異本同穗八月淄青節度使李納

獻毛龜詔示百寮十二月同州沙苑監上言白鹿見

四年四月宗正寺獻毛龜七月右神策軍獻瑞瓜三

蔓合爲一帶而生三瓜九月許州奏嘉禾芝草生

五年五月宋州奏大麥一莖九岐者約一百餘本

六年正月防州言樞連理八月甲寅老人星見是月

京兆府河南府並奏嘉禾異本同穎潮州上言芝草

生連理李樹

七年四月壬寅廣州言甘露降乙卯汴州獻白鳥五

月許州獻白鳥八月同州言祥雲見

九年五月辛卯左神策監州行營節度使胡堅右神

策監州行營節度使張昌皆表奏初城監州鹵中獲

懷土又置烽堡水路迥遠卽時有兩廢鹽井悉生鹽

事符聖德可謂天贊請宣付史館制曰可是月甲午

鄆州言甘露降



十年五月連州言慶雲見

十一年二月同州獻五色鴈六月河陽華州並獻白鳥八月潞州獻白鶴九月成都言甘露降十一月潭州進赤鳥

十二年五月通州奏九樹甘露降六月京兆府進白鼠朗州進白鳥七月丁酉東都留守進芝草甲辰滑州進白雀九月徐州奏嘉禾生十二月甲子左神策軍進白鵲丁亥許州進白麋

十三年八月汴州進嘉禾九月癸亥懷州進嘉禾甲子幽州奏甘露降十月右神策軍進白雀十二月婺

州奏廳前松樹甘露降

十四年正月蔡州進瑞麥四月婺州奏甘露降閏五月乙丑滑州奏黃河清戊辰汴州進白鳥九月丁未朔中書門下奏賀峨嵋獲白鷄丁卯中書門下奏賀苑中獲白鹿

十五年正月潞州進白鳥五月丁未延州進玄兔庚寅韓潭進白鼠七月鳳翔府鷄足山慶雲見十八年五月眉州上言醴泉出八月徐州獻嘉禾白兔

二十一年七月陝州獻紫芝成都府獻嘉禾辛卯潞



州獻白雀

憲宗以永貞元年八月乙巳卽位是月庚戌荆南獻

毛龜二

元和二年正月詔以湖南所獻古鼎付有司初永州百姓唐履昌于路側掘得古鼎重一百一十二斤異之故上獻八月戊辰老人星見

七年十一月東川觀察使潘孟陽上言龍州武安川畚田中嘉禾生有麟食之復生麟之來一鹿引之群鹿隨焉光華不可正視使畫工就圖之并嘉禾一函以獻

九年八月中書門下奏夏綏銀節度使今月八日因取土修城于西北角近倉掘得釜大小共計二百五十四並容六斗已下五斗以上俱無破損如新器物者伏以人天所資粒食爲本錡釜之大火化是因今大軍方興此物自出則知何時藏瘞蓋神誘其衷今之彰呈豈天有所助聖作物感一何昭然望付史館從之

穆宗長慶元年正月帝饗太廟禮畢出朱雀門中路日抱珥五色宰臣蕭俛等率兩省供奉官稱賀於馬前



三年四月同州言文宣王廟甘露降

文宗太和元年十一月河中觀察使薛平奏當管虞鄉縣王賢鄉有白虎入靈峯觀謹按孫氏瑞應圖白虎者義獸也名騶虞王者德至鳥獸澤洞幽冥則見謹畫圖進上勅付所司

三年十一月丁丑朔乙卯司天臺上言太陽當蝕不蝕宰臣率百官表賀

六年七月河陽東川並奏慶雲見八月廣州奏六月二日慶雲見

宣宗大中八年正月陝州黃河清

昭宗文德元年九月雲龍殿前穿井得甘泉以示百寮羣臣上表賀曰臣聞至德動天天乃垂甘露神功浹地地故出醴泉然猶兆自郊圻啓諸甸服未有因於改井得彼甘泉不離禁掖之中便是殿庭之側澄清若鏡汲引而固絕羸餅香美如飴濟利而終期勿藥况銀床萬所玉甃千門味不可以和太羹美不足以調甘食若非皇帝陛下幽通井德明契天宮則何以革故從新致斯玄貺移鹹變苦降此休禎臣等幸偶盛時叨塵寵祿思與堯年野老鑿以興歌願同漢水丈人汲而成藥



哀帝天祐元年九月朱全忠進白兔一隻中書門下  
表賀曰今日東頭承旨常郁至奉聖旨者質素光而  
應候容潔朗以協時既昭耀於明庭實昭彰於聖德  
臣等覽晉中興書徵祥說曰白兔者月精也抱朴子  
云兔壽千歲滿五百歲則色白顧野王云王者恩加  
壽考則白兔見協太陰之瑞實表坤慈應千歲之祥  
雅符乾德伏以皇帝陛下膺圖纂嗣歷紐騰休紹祖  
宗之丕基示孝慈於衆彙敦禮耆老委任勲賢所以  
致八孔之効靈應三秋而發皓來從月窟疊霜毳以  
蒙茸獻自梁庭粲冰毫而皎潔足以增輝瑞譟歸美

皇猷聞天遠自於元勳拭目共觀於多士豈比魯傳  
趙郡獨歌如練之詞實同晉獲壽春又繼凝鈇之詠詔  
曰上天眷祐靈魏効珍道既協於坤慈祥乃彰於月  
窟雪霜是比較晶可觀全忠道貫神明功高鼎鼐果  
因嘉瑞歸善天庭俾頒示於有司冀流光於不朽再  
三嘉翫歎注良深

二年八月河南府奏雒苑谷水屯百姓馬會穀地內  
有嘉禾合穗謹隨表進者詔曰多稼如雲已稱大稔  
異畝同穎益表殊祥張全義尹正邦畿從容廊廟動  
必垂於惠化靜每著於燮調佐時之畧彌章阜俗之



風益顯爰昭玄貺可卜豐年訓農遐掩於衛文獻瑞  
迥同於唐叔載觀禎異尤切歎嘉仍付史館  
後唐莊宗同光元年十二月亳州太清宮道士奏聖  
祖玄元皇帝殿前枯檜再生枝畫圖以進宣示百官  
其表云按瀨鄉記此樹枯來莫知年代自高祖神堯  
皇帝武德二年太上老君見於晉州羊角山語樵人  
吉善行云爲報唐天子吾是爾遠祖亳州曲仁里是  
吾降生之地有枯檜重榮唐祚永興高祖遂於羊角  
山置興唐觀其地改爲神仙縣封羊角山爲龍角旣  
至亳州果有枯檜樹復生枝莠鬱後因安祿山僭號

之時萎悴及祿山殄滅玄宗翠華歸奏枝葉復榮冷  
年十月中又於其上再生一枝約長二尺聳身直上  
迥出凌虛葉密枝繁獨異衆木勅當聖祖舊殿生枯  
檜新枝應皇家再造之期顯大國中興之運同上林  
仆柳祥旣協於漢宣比南頓嘉禾瑞更超於光武宣  
標史冊以示寰瀛宜委本州太清宮副使嘗加簡察  
兼令功德使差道士一人徃彼告謝仍付史館編錄  
三年正月西都留守張筠奏昭應縣華清宮道士張  
冲虛狀四聖天尊院枯檜樹重生枝葉畫圖以進三  
月唐州奏淮瀆廣閩王廟前有兩樹東西相去七尺



五寸其樹各出地亦七尺五寸兩樹相向連理五月  
許州進納兩岐麥一科其月汴州進兩岐麥兗州奏  
任城縣百姓大麥地內有兩岐三穗至四穗者八月  
丙子夜平明壽星見十一月青州符習奏萊州卽墨  
縣人鄉貢士李夢徵室內柱上生芝草兩岐畫圖而  
進勅符習累居藩翰屢顯政能靜以臨人寬而得衆  
撫裕已彰於惠愛輔時又致於休徵固得和氣潛蒸  
靈芝遽產同九莖而表瑞比三秀以呈祥載闕奏陳  
良深嘉歎

三年三月振武節度使維京內外蕃漢馬步使朱守

殷奏臣脩雒陽月波堤至立德坊南古岸得玉璽一  
面上進伏以皇帝陛下明德動天聖靈御宇遂使千  
年之瑞出於九地之間輝煥簡編光華帝道臣竊觀  
異瑞益表太平勅玉以呈祥印惟示信况坊名立德  
地近雒陽當鳳曆之再新與龜書而叶瑞獲茲至寶  
得自忠臣所宜載在簡編垂爲盛美可送中書門下  
宣示百官宰相豆盧革等驗其篆文曰皇帝行寶四  
字圓方八寸厚二寸皆細交龍光瑩精妙莫知湮墜  
之由也謹按自秦漢以來天子之璽六文曰皇帝之  
璽皇帝信璽皇帝行璽天子之璽天子信璽天子行



璽至玄宗時惡神器以璽爲名改名國寶漢末董卓遷獻帝於長安燔燒雒陽宮表術將孫堅攻卓收復京城營于城南軍士見甄宮井上有五色氣入懼不敢汲堅令浚井得漢傳國璽文曰受命于天既壽永昌方圓四寸細交五龍一角小缺王莽逼奪之時投地稍損議者意張讓劫帝出奔掌璽者投之甄井也自六璽之外有傳國璽卽謂此受命璽也起於秦相李斯爲之傳於高皇帝卽漢末甄井所得卽乘輿六寶之一也自隋末迄今喪亂弘多湮墜者耻而不言好事者落然無記吁哉守殷又於積善坊役所得古

文錢四百五十六一十六文得一元寶四百四十五文順大元寶守殷進納勅凡窺奇異盡繫休明所獲錢文式昭玄貺得一者佇歸於一統順天者式契于天心道煥一時事光千載殊休繼出信史必書宜付史館四月陝州柳溪樹連理五月陝州進白兔八月己卯司天奏老人星見十月癸亥司天奏老人星見其月密州諸城縣人徐霸送芝草兩莖嘉禾九穗刺史李紹岳畫圖以進

明宗天成元年十月巴州進嘉禾合穗并圖十一月密州獻芝草并圖宣示中書門下百寮稱賀



二年四月郢州進白鵲五月癸亥懷州進白雀乙丑  
滄州進白鵲六月巴州進兩岐麥其月兗州進三足  
烏華州上言鄭縣羅文鄉百姓李存家有兩岐麥畫  
圖進上八月丁酉青州進芝草其月壬寅平明前壽  
星見于丙上  
三年九月閬州上言度支巡官陳知禮家生芝草兩  
本畫圖以進是月宰臣王建立進玉盃壹隻上有傳  
家國寶萬歲盃字水運都將段洪趙實於臨河縣下  
得之

四年七月遂州夏魯奇進嘉禾一莖九穗勅旨三秀

靈芝標仙籍而罔資世務九莖嘉穀按地謀而實表  
豐年既呈殊異之祥雅叶治平之運宜付史館編記  
八月戊戌司天奏老人星見其色黃明

長豐元年七月宿州進白兔以銀籠盛之八月丁未  
司天奏老人星見黃明潤大在井十一度時帝御便  
殿對宰臣因問曰司天奏老人星見卿等見否馮道  
曰老人壽星也每歲秋分見爲嘗其色黃明則表聖  
壽臣等雖不見星出則定矣

三年十月萊州卽墨縣人王友家生芝草一莖三枝  
其枝又分兩岐或三岐上漸闢成片而圓色紫其片



卽爲葉葉莖一色其表白高尺餘青州節度使進之  
并圖上又出宮中舊獻芝草四株其色莖葉皆同而  
枝葉多少爲異耳

末帝清泰三年六月洛州獻野繭二十斤

晉高祖天福五年五月宋州貢瑞麥兩岐八月萊州  
芝草生

六年八月登州蓬萊縣民楊蔚家芝草生畫圖進之  
七年四月甲寅朔避正殿不視朝司天前奏日蝕故  
也是月百官守司太陽不虧上表稱賀

少帝天福八年有白鳥棲於作坊桐樹作坊使周務

勅上言令捕而進之

開武元年六月襄州獻白鵲

漢高天福十二年二月辛未卽位於晉陽乙酉陽曲  
縣令崔握遣主簿呂光鄴進白兔壹隻帝覽而嘉之  
識者曰殷有白狼周有白魚唐有白雀皆爲瑞况帝  
以乙卯降生而有此兆得不爲大慶乎四月星官奏  
有氣黃紫多龍鳳之狀塊莽盤旋不離城上識者曰  
天不能無雲而雨不能無氣而立今瑞氣如此劉氏  
其大昌盛乎

隱帝乾祐二年四月潁州獻紫兔白兔皆緘之於櫝



符瑞四  
出示羣臣六月潁州獻白鹿

三年五月澶州衛南縣民王綰田麥兩岐九十二莖  
二十四穗曹州乘氏縣民王豐麥一莖三穗

周太祖廣順二年四月徐州以兩岐麥二十本來獻  
八月靈武獻嘉禾二銀盤

世宗顯德元年正月朔日後景色昏晦日月多暈及  
帝卽位之日天氣晴朗中外肅然五月丁亥是夕月  
重輪是月辛卯世宗親征河東午後慶雲見於西南  
旣脯風雲雨雹起于東北

五年二月登州貢芝草三枝十月登州刺史劉福進  
牟平縣畫到芝草圖一面十二月丁丑朔朗州上言  
醴陵縣玉仙觀山門中舊有田二萬餘頃久爲山石  
閉塞昨於七月十七日夜有暴雷霹開其路復通詔  
褒之

六年正月唐州民於野田中得玉璽玉紐本部遣使  
來上

冊府元龜

冊府元龜

帝王部

卷之二十五

十一



六平... 册府元龜 帝王部 卷之二十六

册府元龜

淮南李嗣京參閱

西極文翔鳳訂正

豫章黃國琦較釋

帝王部 二十六

感應 神助

感應

書曰惟德動天又曰至誠感神是知為善者降祥好謙者受福天人相與之際交感訢合如律之命呂雲之從龍未嘗斯須而不應也故古者賢聖之君莫不



通三統之要重萬靈之命思惟往古窮極至治兢兢業業罔敢暇豫德之盛也合於天地誠之至也通於幽明神以知來聰以知遠善行無迹有開必先則感而應之乃自然之理也乃若商湯桑林之禱大雨斯降漢武竹宮之祀神光屢燭宣帝建祖廟而白鶴集玄宗封泰山而勁風止策書所紀其流實繁斯皆清衷玄感靈貺昭答高明聽卑若嚮之應也董仲舒有言曰王者修五嘗之道故受天之祐而享鬼神之靈德施於方外延及群生也豈不臧與  
殷湯時大旱七年殷史卜曰當以人禱湯曰必以人

禱吾請自當遂齋戒剪髮斷瓜以已為牲禱於桑林之社果大雨

漢文帝十六年四月以郊見渭陽五帝廟燿火舉而祠若光輝然屬天焉

武帝元鼎四年親祀后土東幸汾陰男子公孫滂洋等見汾旁有光如絳帝遂立后土祠於汾陰睢上五年十一月始郊拜太一祠上有光是夜有美光及

畫黃氣上屬天太史令談祠官寬舒臣欽若等曰談司馬談也寬舒

姓關等曰神靈之休祐福兆祥宜因此地光域立泰時壇以明應明著美光及黃氣之祥帝嘗以正月上辛用事甘泉



圓丘使童男女七十人俱歌昏祠至明夜嘗有神光如流星止集於祠壇天子自竹宮而望拜以竹為宮天子居中

竹宮去壇三里百官侍祠者數百人皆肅然動心焉

元封元年正月親登崇高臣欽若等曰崇與嵩同御史乘屬在

廟旁吏卒咸聞呼萬歲者三四月癸卯登封泰山其夜若有光晝有白雲起封中

二年夏有芝草生甘泉殿房中天子為塞河與通天若有光云為塞河及造通天臺而神光之應

四年三月祠后土詔曰朕躬祭后土地祇見光集於靈壇一夜三燭幸下都宮殿上見光其赦汾陰夏陽

中都死罪已下

六年三月幸河東后土詔曰朕體首山昆田出珍物昆田者山之下田也武帝祠首山故神為出珍物化為金祭后土神

光三燭其赦汾陰殊死已下

太初二年三月幸河東祠后土詔曰朕用事介山祭后土皆有光應介山在河東皮氏縣東南其山周大十里高三十里其赦汾陰

安邑殊死已下

太始三年二月幸琅邪禮日成山祭日於成山也登之采浮

大海山稱萬歲

四年四月幸不其不其山名其音基因以為縣在東萊祠神人于交門



宮神人遂萊仙人之屬也若有鄉坐拜者如有神人之景

象嚮坐而拜也神坐見且黑且白且大且小鄉坐三拜鄉讀曰嚮

宣帝本始二年六月尊孝武廟為世宗告祠廟日有

白鶴集後庭以立世宗廟告祠孝昭寢有鴈五色集

殿前西阿築世宗廟神光興于殿旁有鳥如白鶴前

赤後青神光又興于房中如燭狀廣川國世宗廟殿

上有鐘音房戶大開夜有光殿上盡明迺下詔赦天

下

神爵元年正月帝始幸甘泉郊見泰畤數有美祥三

月幸河東祠后土有神爵集詔曰朕飭躬齋精祈為

百姓東濟大河天氣清淨神魚舞河幸萬歲宮神爵

翔集其收元神爵

四年二月詔曰脩興泰一五帝后土之祠祈為百姓

蒙祉福鸞鳳萬舉蜚覽翔翔集止于旁萬舉猶言舉以萬數也蜚

覽言飛翔齋戒之暮神光顯著薦鬯之夕神光交錯

鬯香酒所或降於天或登於地或從四方來集于壇

上帝嘉嚮海內承福其赦天下

五鳳三年三月行幸河東祠后土詔曰朕方躬齋戒

郊上帝祠后土神光竝見或興于谷燭耀齋宮十有

餘刻甘露降神爵集已詔有司告祠上帝宗廟



後漢明帝永平三年夏旱而大起北宮僕射鍾離意詣闕免冠上疏曰伏見陛下以天時小旱憂念元元降避正殿躬自克責而比日密雲遂無大潤豈政有未得應天心者耶昔成湯遭旱以六事自責曰政不節邪使人疾邪宮室崇邪女謁盛邪苞苴行邪讒夫昌邪切見北宮大作人失農時此所謂宮室崇也自古非苦宮室小狹但患人不安寧宜且罷止以應天心臣意以匹夫之才無有所能久食重祿擢備近臣比受厚賜喜懼相半不勝愚慙狂營罪當萬死帝策報詔曰湯引六事咎在一人其冠履勿謝比天降旱

密雲數會朕戚然慙懼思獲嘉應故分布禱請闕候

風雲北祈明堂南設雩場今又勅大匠止作諸宮減

省不急庶消災謹詔因謝公卿百寮遂應時澍雨所

以注萬物故曰澍雨

和帝永元六年七月京師旱幸雒陽寺寺官舍也錄囚徒

舉寃獄收雒陽令下獄抵罪司隸較尉河陽皆左降

未及還宮而澍雨皇太后紀云有囚實不殺人而被誣羸困與見鄧太后察視覽之即

收雒陽令下獄時帝幼太后臨朝

魏明帝太和元年初營文昭皇后宗廟掘地得玉璽方一寸九分其文曰天子羨思慈親明帝爲之改容



以太牢告廟又嘗夢見后於是差次舅氏親疎高下  
敘用各有差賞賜累鉅萬

後魏明元泰嘗四年八月帝嘗於白登廟將薦熟有  
神異焉太廟博士許鍾上言曰臣聞聖人能享帝孝  
子能饗親伏惟陛下孝誠之至通於神明近嘗於太  
祖廟有車騎聲從北門入殷殷輶輶震動門闕執事  
者無不肅慄斯乃國祚永隆之兆宜告天下使咸知  
聖德之深遠

太武太延元年三月不雨六月使有司遍請群神數  
月大雨是日有婦人持一玉印至路縣候孫家賣之  
孫家得印奇之求訪婦人莫知所在其文曰旱後平  
寇天師曰龍文紐書云此神中三字印也

文成興安二年正月遣有司詣華嶽廟立碑數十人  
在山上聞虛中若有聲音聲中稱萬歲云

和平五年四月帝以旱故減膳責躬是夜澍雨大降  
孝文泰和元年五月乙酉車駕祈雨於武州山俄而  
澍雨大洽

二年五月京師旱辰祈星天日月五星於北苑親自  
禮焉減膳避正殿祭之夕澍雨大洽

三年五月丁巳帝祈雨於苑開陽門是日澍雨大洽



二十年七月戊寅帝以久旱咸秩羣神自癸未不食  
至於乙酉是夜澍雨大洽帝以久旱不雨輟膳三日  
百寮詣闕引在中書省帝在崇虛樓遣舍人問曰朕  
知卿等至不獲相見卿何爲而來平南將軍王肅對  
曰伏惟陛下輟膳以經三日羣臣焦怖不敢自寧臣  
聞堯水湯旱自然之數須聖人以濟世不繇聖人以  
致災是以國儲九年以禦九年之變臣又聞至於八  
月不雨然後君不舉膳昨四郊之外已蒙滂澍惟京  
城之內微爲少澤蒸民未聞一食陛下輟膳三日臣  
庶惶惶無復情地帝遣舍人答曰昔堯水湯旱賴聖

人以濟民朕雖居羣黎之上道謝前王今日之旱無  
以救恤應待立秋尅躬自咎但此月十日已來炎熱  
焦酷人物同悴而連雲數日高風蕭條雖不食數朝  
猶自無感朕心未至所致也肅曰臣聞聖人與凡同  
者五嘗異者神明昔姑射之神不食五穀臣嘗謂矯  
今見陛下始知其驗且陛下自輟膳以來若天全無  
應臣亦謂上天無知陛下無感一昨之前外有滂澤  
此有密雲臣卽謂上天有知陛下有感矣帝遣舍人  
答曰昨內外貴戚咸云四郊有雨朕恐此輩皆勉爲  
之辭三復之慎必欲使信而有徵此當遣人徃行若



果雨也便命大官欣然進膳豈可以近郊之內而慷慨要天乎若其無也朕之無感安用朕身以擾民庶朕志確然死而後已

宣武景明四年旱命尚書鞫京師見囚務盡聽察帝又減膳撤懸俄而澍雨大洽

孝明帝神龜二年二月詔曰農要之月時澤弗應嘉穀未納三麥枯悴德之無感歎懼兼懷可勅內外依舊雩祈率從祀典察獄理冤掩骼埋胔冀瀛之境往罹寇暴野死者旣多白骨橫道可遣專令收埋賑窮恤寡救疾存老准訪前式務令周備三月甲辰澍雨

大洽

後周武帝保定三年五月甲子朔避正殿寢不受朝以旱故也甲戌乃雨

隋文帝開皇二年四月己酉早上親省囚徒其日大雨

唐高祖初爲唐王義寧二年三月不雨至四月乃命祈禱掩骼埋胔於是大雨

武德三年自夏不雨至於八月帝齋居稽顙四向拜遣治書侍御史孫伏伽告天地神曰某蒙聖明祐助得爲人主有何殃咎致使炕旱某若無罪使三日內



雨某若有罪請殃某身無令兆民受茲饑饉應時大雨

四年三月帝以旱親錄囚徒俄而澍雨

太宗貞觀三年三月旱庚午大赦天下癸酉雨自是赦書所至其雨便降兆庶以爲異焉

六月終南等數縣蝗帝至苑中見蝗掇數枚而祝之日民以穀爲命而汝食之是害於百姓有過在予一人爾其有靈但當食我無害百姓將吞之侍臣恐致生疾遽諫止太宗曰所冀移災朕躬何疾之避遂吞之自是蝗不爲災

十二年正月帝朝於獻陵先是大雨雪及帝入陵院悲號哽咽百辟哀慟是時雪益甚寒風暴起有蒼雲出於山陵之上俄而流布天地晦冥至禮畢帝出自寢宮步過司馬北門泥行二百餘步於是風靜雪止雲氣歇滅天色開霽觀者竊議咸以爲孝感所致焉五月甲寅帝以旱避正殿自去冬不雨至是令文武官五品以上各上封事極言得失勿有所隱減膳罷役分遣使人賑恤寡乏理囚徒申冤屈司空長孫無忌以旱遜位不許自是澍雨應時歲大稔十七年六月大旱甲午避正殿減嘗膳丁未雨降百



寮奉賀請復嘗膳御正殿詔從之

二十三年三月自去冬亢旱至是始雨帝謂侍臣曰天生蒸民樹之人君以牧養而移時不雨自天亢旱粟麥不成春田未闢朕憂其窘罄無忘於懷將廩給之故不令乏絕耳是日雨降

高宗永徽元年自夏不雨至七月詔在京諸司見禁囚宜並慮過所司精加勘當速卽斷決尋而降雨三年自去年九月不雨至於正月詔避正殿御東廊以聽政仍令尚食減膳至二月壬寅大雨雪乙巳復御兩儀殿南面視事

麟德元年五月丙寅以久旱遣使命禱名山大川避正殿御帳殿丹霄門外聽政凡三日而澍雨

乾封二年春正月丁丑以時旱避殿親錄囚徒令所司減膳其日雨降

玄宗先天二年三月甲戌帝以旱親往龍首池祈禱有赤蛇自池而出雲霧四布應時澍雨

開元十三年十一月封禪帝登泰山至齋宮其夕陰雲慘冽勁風四起裂幕折柱寒氣切骨帝露立祈請仰天自誓曰某身有過請卽降罰萬人無福亦請某爲當罪應時風止天地清晏日氣和煦及升壇休氣



四塞登高奏樂有祥風自南至絲竹之聲飄若天外及禪社首五色雲見日重輪

十四年六月丁未以久旱分命公卿祭山川巳卯河北道及太原澤潞等州皆雨祭地獄使李嵩上言曰臣至邢州雨降盈尺臣切問野老皆云往十二年春夏大旱六月下旬方始降雨其歲河朔大熟粟斗五錢今年得雨雖晚猶旱於前歲百姓欣然咸有秋望臣受命之日祈雨嘗山玉幣未陳明靈已應實陛下至誠玄感先天不違

十七年十一月十六日朝于昭陵掌事者彷彿遙覩

太宗立神殿前及玄宗入寢宮闈室中有警咳又於寢宮門外設奠以祭陪陵功臣將相蕭瑀房玄齡等數十人如聞其舞蹈之聲

十九年四月巳丑侍中裴光庭中書令蕭嵩奏曰頃以春季夏初微誓時澤雖無溥潤尚未爲災臣等親承德音憂勤萬姓虔誠雲漢自結壇場有孚斯感不疾而速則有鶴鳥和鳴油雲沓起未崇朝而四溟飛灑不終夕而萬里滂沱生靈以之相慶草樹絲而自樂臣等幸參近侍親奉殊祥蹈躍之誠實百常品望宣付史館從之因詔曰政教不修則陰陽隔併精誠



有感則風雨順時頃自暮春爰涉初夏其澤未降農務是憂所以親結壇場用伸祈禱豈神聰意達而應不逾時斯實上玄昭鑒之深亦是卿等燮理之効宜加勉勵以答靈心開府儀同三司尚書右丞相宋璟等奏曰近者日永南陸雲密西郊鬱彼炎氣暫愆時雨陛下順天布德憂人在念潔壇菲膳恤獄緩刑故得膏澤應期會旬而至夜良田望歲自公而及私觀其洒液九重雜梅香而其溢含涼入水將麥氣而俱清臣等預睹休和叨承霑沐手詔曰頃自春涉夏雨未流施勤恤之心切憂農務是用寬刑宥過減膳撤

懸責已祈天躬親禱祠上玄垂鑒其澤應時嘉夏種之不愆佇秋成之有望爰與群公卿士同荷休徵各勉其誠敬承天德

五月壬申京師旱帝親禱興慶池是夜大雨乙亥侍中裴光庭等曰昨二十五日伏見高力士奉宣勅旨親於興慶池投龍祈雨伏以何言者天卑聽以平施惟微者聖玄感而降祥用能咸孚響臻幽贊昭應聖德美利其至矣哉頃西郊微愆南畝不害遠自河陝已聞沾洽近次咸秦頗未均被而聖情遷軫憂勞日晏降天步禱神池屑然盼饗若有從助俯祈萬福之



祐仰叩三靈之心言發而旋雲朝隤神通而甘露降  
澍人欣華黍之盛物覩由庚之樂不疾之速書契所  
未聞至誠之感皇王所不載霑休之慶曲成羣物况  
在臣等切倍嘗情望宣付史館式彰昭感之美手詔  
報曰爰自今春時雨愆序切憂農務無忘寢興陝維  
兩郊已聞流霑而咸京近縣尚未霑濡憫禾黍以疚  
懷仰雲漢而翹首投龍致祭親禱靈池誓移咎於薄  
躬庶垂祐於黎獻神道昭著鑒此虔誠其澤應期嘉  
生遂性亦是卿等同心燮理勩力謀猷上下咸和致  
茲休應豐年可望慶慰良深麟鳳飛翔未爲瑞也

七月甲戌以久旱帝親禱於興慶池翼日大雨丙子  
少府監馮紹正奏曰自夏以來時稍微旱昨令臣畫  
龍刻魚聖躬親用祈禱先天不違油雲鬱興甘澤滂  
降百穀豐就萬物滋成臣忝有司實荷殊慶請宣付  
史館以闡皇猷手詔報曰黍稷垂成實滋甘澤旣屬  
久旱懷憂匪寧思拯黎元靡神不禱靈心昭鑒降此  
休徵覩垂穎之可觀佇大獲之爲慶編之青史良有  
愧焉

二十四年六月以久旱命河南尹李適之祭嶽瀆祈  
雨是日澍雨適之奏賀曰聖心纔啓靈貺潛通膏澤



竝霑罔不滂濡請宣付史館仍於濟源縣虔脩賽禮  
手詔報曰道貴以誠神無不應豈朕之先意亦卿之  
用心川嶽効靈其霖竝洽請行賽禮深得事機宜宣  
付史館用依來請  
二十八年劍南節度使章仇兼瓊奏曰吐蕃以五月  
十八日安戎城斷其水路至二十一日城東湧出一  
泉將夜城南面又湧出一泉軍士飲之不竭侍中牛  
仙客中書令林甫上表賀曰此城徃緣無備權屬吐  
蕃天威所臨復爲我有而犬戎自送其死且或執迷  
率彼兇徒輒敢違逼城中在昔唯水爲虞雖佇之則

多而汲之路斷陛下每憂無物必期靈祐聖心有屬  
神道玄通遂使拆石流泉分巖瀉液動天地而昭應  
與造化而同功三軍所資一朝皆足既使無渴乏之  
慮益勵忠勇之心剪滅寇戎從此非遠傍稽典策博  
考禎休以欣以躍實倍嘗品請宣示百寮編諸册簡  
帝手詔報曰城之還我乃復其初天意神心自嘗幽  
贊克濟軍旅湧出雙泉不假梅林有過疎勒編諸竹  
帛任卿意焉  
天寶四載七月蜀郡上言道士御紫虛投籠設醮于  
江潭有大蛇長一丈自潭遊出文彩五色有異嘗蛇



其上有慶雲紛郁望徧諸史冊從之

十四載三月丙戌勅頒綠少雨遍於致祭旋降甘澤  
實荷靈祇其先令中使祭者別有昭報京兆府比來  
應有所請處并畿內名山靈跡竝令府縣長官各申  
賽祭

肅宗乾元二年正月籍田禮畢還大明宮自前年旱  
冬又無雪禮畢降雪盈尺

代宗廣德二年二月丁亥親拜南郊初上將饗太廟  
齊之夕歲星爲太白同躔辟而不犯司天臺夏官正  
徐承嗣上言曰木處仁君恩於養也金全義德體其

政也今月四日臣伺候屬輕濛隱映光跡暫明位指  
東西不盈南北勢凌密近切慮相干陛下展禮齋宮  
陰騰又蔽星擬土錯不露其瑕及廟宿精誠天容若  
鏡今太白避歲之審二尺有餘昔熒惑守心之明三  
退無謬加以禋祀五帝敬告百神是憑法象呈休蒼  
生致福偃兵歸馬不遠來期孝理行歌起于茲景事  
殊古典應美前書望付史館兼示中外許之  
永泰元年七月庚子以旱故禱諸神祠是日雨降盈  
尺時京師米價騰貴斛至萬餘錢至是霈澤人心稍  
安



德宗興元元年六月戊午帝發興元是日大雨將入斜谷路嶮峭多在巖石之間議者以爲行至谷中若遇向之甚雨閣道壞絕進退何從咸切憂焉及入谷之後天象霽朗曾無纖雲以至京師無風雨之虞衆情欣欣皆謂聖德感通自天祐也

貞元六年四月以旱下詔免減稅戊午澍雨踰旬遠近霑足

十三年四月自春以來時雨未降正陽之月可行零祀遂幸興慶宮龍潭爲兆庶祈禱焉忽有白鷗鷺沉浮水際羣類翼從其後左右侍衛者咸驚異之俄然

莫知所往方悟龍神之變化遂相率蹈舞稱慶至乙丑果大雨遠近滂沱

憲宗以永貞元年八月乙巳卽位於宣政殿受冊先是順宗寢疾不能言王伾王叔文爲學士居翰林通於內官李忠言宣下詔令韋執誼爲宰相奉而行之天下危懼連月陰雨及定策雨遂止卽位之日天氣清明臣下繇是知天命之有歸矣

元和二年正月辛卯有事於南郊將及大禮陰氣凝閉浹旬不開羣有司慮降雨雪以不克展禮爲懼宰臣議請改日帝曰郊廟重事吾齋戒有日豈以將有



雨雪而廢乎泊三大禮方享獻之際皆景物澄霽及鑿輿就次則降微雪大駕將動則又止焉翼日御樓宣赦纔畢陰雲復結瑞雪盈尺衆情懽悅咸以爲聖心昭感所致

八年二月辛未帝以久旱親祈雨於禁中是夜降霑霑足

十年正月下制討吳元濟自去年無雨雪至是討元濟詔下乃雨雪

文宗開成元年二月庚申帝幸龍首池觀內人賽雨自春少雨帝孜孜憂勤徧禮羣望至是其澤屢降中

外咸悅帝賦暮春喜雨詩百言咸有屬和

三年正月癸未以旱下詔放逋租及寬刑獄其日大雨

四年六月戊辰以久旱分命群官徧祠祈禱帝自卽位每歲有微旱卽虔誠祈禱至是久旱帝於紫宸殿對宰臣憂形於色宰臣以星官所奏天時當爾乞無過勞聖慮帝嘿然改容曰朕爲天下主無德及人致此災旱今又謫見于上若三日不雨當退歸南內更選賢明以主天下宰臣嗚咽流涕各請罪乞免相位是夜澍雨大洽



後唐莊宗同光元年四月卽位於魏州時正月不雨至是人心憂恐洎宣赦之日降雨彌溥耒耜滿野上下歡康稿苗復茂麥熟倍嘗

明宗初仕莊宗天祜十四年契丹圍周德威於幽州帝與李存審帥師同討自易州北山而行詰旦微雨諸將懼雨淋漓帝祝曰彼蒼垂祐國難終平敢希浹旬早得晴朗俄而開霽衆心咸悅

天成四年二月甲子車駕歸京宿於中牟縣百官詣行宮起居各賜酒食上謂侍臣曰麥田稍旱朕以暗禱祈乙丑屆鄭州雨三日百辟稱賀

長興元年二月甲寅赴南郊壇之齋宮是夜陰雲蔽密至二鼓微雨帝詔問司天官擇日奏曰聖德動天百靈斯會卽應便止至三鼓雨止星象晴明瞻視如晝咸以爲盛德感也

末帝清泰元年七月詔曰昨以稍愆時雨慮損嘉禾朕親赴龍門遍申祈禱甘澤尋降豐稔可期宜令元差禱雨官各赴祠宇昭賽

漢高祖天福六年初爲太原節度使赴任晉陽大旱帝入境謂賓從及左右曰吾始衣繡還鄉甚有德色今一境大旱五稼將枯豈非薄德寡祐而致是邪帝



册序元覽 感應 卷之二十一  
乃際地設脯醴望山川而禱曰某本生此地濫鎮北  
方朝廷差來不敢違旨在上者無德而祿其速身歿  
在下者以食爲天難加衆咎願興雲雨以救焦勞灑  
泣致拜其日大雨帝旣下車入謁興安王昌寧公廟  
每致祈禱繇是境內大稔蓋精誠之所感也是歲天  
下飛蝗東距於海西至隴右南極湖湘北越燕薊川  
井廬舍無不填滿唯入太原山谷中者皆抱草木而  
死時天下蝗亦相繼而死焉但五稼已傷而太原獨  
豐人甚異焉

隱帝乾祐元年五月丙辰以久旱幸道宮佛寺禱雨

是日大澍

二年內出宋州所送蝗抱草死者以示羣臣乃命止  
捕馬差官祭之

周太祖以乾祐二年討李守真太祖決欲進攻十七  
日於西砦抽郭崇業仁魯及手下兵士與東砦軍進  
攻柁衝破弩百道齊發俄而西北黑風揚沙晦暝梯  
衝搖蕩人不能開目太祖令禱河伯祠曰吾奉辭伐  
罪以救黎元兇醜拒張勞兵攻伐神道禍淫合仲冥  
助風師無狀不祐王師明靈感通速宜止絕如無顯  
効祠其危乎莫訖而風止



丹元記 神助  
世宗初節制澶淵凡三載或水旱不時有禱于神祠  
未嘗不應時而驗顯德四年親征淮南降下壽州還  
京四月戊午到穎上縣是日大雨先時帝在下蔡日  
宰臣以時雨稍愆上奏帝曰賊壘已平班師在近雨  
當不日矣至是果如聖語

神助

夫大人斯興神明鑒德至誠多感惠迪多助盼蟹幽  
贊顛沛靡失斯自天之孚祐也故有宅心清明發秀  
岐嶷越在側微之際已彰保定之徵及乎扶義臨戎  
勞神焦思顧誕靈命率籲衆謀將拯橫流以遏亂畧

繇是猛鷲効用靈祇告猶冒矢石而如夷視水火而  
可蹈寒暑爲之易節風雷爲之借勢休應震動蠢類  
薦祉况乃吉夢先啓聖知獨悟懇激之切至人事之  
符合者哉

黃帝有聖德初百神朝而使之應龍攻蚩尤戰虎豹

熊羆四獸之力以女媧止淫雨

史記云皇帝教熊羆  
貔貅羆虎以與炎帝

戰於阪  
泉之野

虞舜初居於媯汭其父瞽瞍嘗欲殺之使舜上塗廩  
瞽瞍從下縱火焚廩舜乃以兩笠自扞而下去得不  
死後瞽瞍又使舜穿井爲匿空旁出舜旣入深瞽瞍



與象共下土實井舜從匿空旁出去舜以權謀自免亦大聖有神人之助也

夏禹初為司空觀於河有長人白面魚身出曰吾河精也呼禹曰文命治淫授禹河圖言治水之事乃退入于淵

漢高祖初為漢王二年四月與項羽大戰于彭城靈壁東圍漢王三匝大風從西北起折木發屋揚沙石晝晦晦暗也楚軍大亂而漢王得與數十騎趣去

八年冬帝東擊韓王信餘寇於東垣真定也還過趙趙相貫高等陰謀欲殺帝帝欲宿心動問縣名何曰柏

人帝曰柏人者迫於人也去弗宿

宣帝初生數月遭巫蠱事收繫郡邸獄郡邸獄治天下郡國上計

計者巫蠱獄繫收繫者衆故寄此獄連歲不決後元二年望氣者言長

安獄中有天子氣武帝遣使者分條中都官獄中都官京

師諸官府也繫者輕重皆殺之內謁者令郭穰夜至郡邸

獄廷尉監郿吉拒閉使者不納曰皇曾孫在他人亡辜死者猶不可况親曾孫乎相守至天明不得入穰還以聞因劾奏吉武帝亦悟曰天使之也因赦天下郡邸獄繫者獨賴吉得生

後漢光武初為更始大司馬徇河北時王郎移檄購



光武光武趣駕南軒至饒陽晨夜兼行蒙犯霜雪天  
 時寒面皆破裂至虘沱河候吏還曰河水流澌無船  
 不可濟官屬大懼光武令王霸往視之霸恐驚眾欲  
 且前阻水還即詭曰冰堅可渡官屬皆喜光武笑曰  
 候吏果妄語也遂前北至河河水亦合乃令霸護渡  
 度也堅護未畢數騎而冰解光武謂霸曰安吾眾得濟免  
 者卿之力也霸謝曰此明公至德神靈之祐雖武王  
 白魚之應無以加此今文尚書曰武王度  
 孟津白魚躍入王舟光武謂官  
 屬曰王霸權以濟事殆天瑞也進至博城下乃惶惑  
 不知所之有白衣老父在道旁指曰努力信都郡為

長安守去此八十里

信都郡今冀州也

光武即馳赴之信都

太守任光開門出迎

魏太祖之討張魯魯遣五官掾降帝衛橫山築陽平  
 城以拒王師不得進魯走巴中軍糧盡太祖將還西  
 曹掾東郡郭誡口不可魯已降留使既未及衛雖不  
 同攜可攻縣軍深入以進必克退必不免太祖疑之  
 夜有野麋數千突壞衛營軍大驚夜高祚等誤與衛  
 眾遇祚等多鳴鼓角會眾衛懼以為大軍見掩遂降  
 晉宣帝為魏太傅勒兵從闕下趣武庫當曹爽門人  
 逼直住爽妻劉怖出至聽事謂帳下守督曰公在外



今起兵如何督曰夫人勿憂乃上門樓引弩注箭欲發將孫謙在後牽止之曰天下事未可知如此者三帝遂得過去

文帝爲魏相國諸葛誕據壽春叛命築壘圍之初壽春每歲雨潦淮水溢嘗掩城邑故帝之築圍也誕笑曰是故不攻而自敗也及大軍之攻亢旱踰年城旣陷是日大雨壘皆毀

元帝爲左將軍從討成都王穎蕩陰之敗也叔父東安王繇以穎所害帝懼禍及將出奔其夜月正明而禁衛嚴警帝無繇得去甚窘迫有頃雲霧晦暝雷雨

暴至微者皆弛因得潛出穎先令諸關無得出貴人帝旣至河陽爲津吏所止從者宋典後來以鞭策馬而笑曰舍長官禁貴人汝亦被拘邪吏乃聽過至維陽迎太妃俱歸國

後魏孝文五歲受禪文明馮太后以帝聰聖後或不利於馮氏將謀廢帝乃於寒月單衣閉室絕食三日帝亦無恙

唐高祖初爲唐公大業十三年起義師於太原七月師次霍邑隋武牙郎將朱老生陳兵拒險義師不進屯兵於賈胡堡會霖雨積旬饋運不給高祖患之忽



有白衣老父詣軍門請見曰予霍山神遣語大唐皇帝若向霍邑當東南傍山取路八月雨止我當助爾破之高祖初晒之遣人東南視地果有微道高祖笑曰此神不欺趙襄子豈當負吾邪八月己卯雨果霽高祖大悅以太牢祭霍山

太宗初討宋金剛賊徒日感嘗欲覘敵潛軍遠抄騎皆四散太宗與一甲士登丘而睡俄然賊兵四面雲合不知覺也會有蛇逐鼠觸甲士之面甲士驚起因見賊至遽白太宗而俱上馬馳百餘步爲賊所及發大羽箭射之殪其驍將賊騎乃退當時以爲異焉

貞觀十九年征遼五月丙子師次臨遼頓其夕遼水減二尺三軍慶悅咸以爲得天之助

玄宗始三歲封楚王時則天因御高樓抱之眺望誤墜於地左右失聲奔下扶擁帝怡然無虧損之狀則天甚奇之

肅宗母楊太后方娠時玄宗爲太平公主所忌密謂侍讀張悅日用事者不欲吾多息嗣恐禍及此婦人其如之何密令悅懷去胎藥而入太子於曲室躬自煮藥醺然似寢寢神人覆鼎旣寤如是者三太子異之告悅悅曰天命也無宜他慮及爲皇太子天寶十



四年安祿山反玄宗幸蜀留太子在後宣慰百姓賊師追至渭便橋已斷渭水初漲又無舟楫太子於水濱號令百姓願從者三千餘人因而涉渡而南遇潼關散卒誤以爲賊與之戰士多傷敗收其餘復濟渭而北太子過渭之後渭水之漲隨馬跡而高丈餘追者盡溺衆心大喜以爲聖感帝行至豐寧南見大河天塹之固欲整軍北渡將詣豐寧忽大風飛沙礫數步之間不辨人馬繇是廻軍東趣靈武風沙頓止天地廓清

乾元三年正月甲申元帥奏於河陽陝東大破賊文

貳百官奉表稱賀曰伏見元帥行營露布伏承官軍大破逆賊二千餘衆兼燒浮橋柵壘等悉皆蕩盡陝東大破兇徒斬及生擒甚衆又見中書門下稱河陽橋頃因河陵衝突連艦偏斜昨一軍吏夜間橋下聞見有神人云我是毗沙門天王爲國家正此橋柱及平明橋忽正又勝州已北百姓數千人忽見兵馬極衆喚百姓索食其中有人云我是張韓公及王忠嗣領此兵馬爲國討賊不日當太平百姓陳祭訖須臾不見此皆聖德所感人神合符靈應昭然今古未有者臣聞聖人者與天地合德日月齊明神祇告休山



川輸貺雖五兵暫阻而七德肇脩伏惟乾元大聖先天文武孝感皇帝陛下眷德昭融文思光被道冲玄漠德同淵明三靈貢珍百神効職頃者兇徒未殄侵軼京師東郊不開尚稽大討幽明增憤動植未康固得天祇護梁神兵啟陣喧聲夜發狀若構於鼃鼃靈契昭然威德清於蚊蚋三軍盡覩百姓咸觀此實止戈之先兆也及師出交懷一戈而羣兇塗地兵臨分陝再戰而餘孽殄殲擒元惡而詰彼兇殘焚賊橋而斷其歸路莫不覩兵勢以懾竄聞軍聲而畏威撲滅之期於斯見矣此則天時人事斷在目前睿筭神功

致之度內皆經籍未載古今蔑聞者也詔曰朕爲人父母時屬艱虞東夏不康近郊多壘除妖撲燎戎馬交馳父出夫行征徭未息蓬頭汗甲今已累年憂我人斯寢興誠切達精誠於天地委長策於廟堂宗社假靈王師克勝殘逆窮搏聚而相持造舟橫河樹柵憑岸一鼓齊進應時殲蕩陝東連捷吉語驟來平賊安人指期可待自古王者得神以興城梁不假於人功士馬或稱於幽贊休徵斯在靈應不違凡百具察相同慶慰

敬宗寶曆元年正月乙卯命中使張宗肇持緋衣賜



長安縣主簿鄭翦翦時主役太清宮御院忽於院前西序見一白衣老人云此下有井正直皇帝過路汝速實之不然罪在不測翦惶遽領役人視之其處已陷數尺發之則一古井宛然驚顧之際已失老人所在翦遂告功德使以聞帝歸至宮宰臣及供奉官於馬舞蹈稱賀時有詔命翰林學士韋處厚紀述以表其異

後唐武皇初爲河東節度使追黃巢至于曹州班師過汴汴帥朱溫迎勞於封禪寺請帝休於府第乃以從官三百人及監軍使陳景思館於上原驛是夜張

樂陳宴席汴帥自佐饗出珍幣侑勸帝酒酣戲諸侍妓與汴帥握手叙破賊事以爲樂汴帥素忌帝乃與其將楊彥洪密謀竊發彥洪於巷陌連車樹柵以扼奔竄之路時從官者皆醉俄而伏兵竊發來攻傳舍武皇方大醉噪聲動地從官十餘人捍賊侍人郭景銖滅燭扶帝以茵幕裹之匿於床下以水洒面徐口汴帥謀害司空帝方張目而起引弓抗賊有頃煙火四合復大雨震電帝得從者薛鐵山賀回鶻等數人而去雨大如不辨人物隨電光登尉氏門縋城而出得還本營



明宗初爲邢州節度使從莊宗南伐次胡柳陂前軍周德威爲輜重所撓一軍不利莊宗以中軍戰勝兩軍勝負相半而左馳右趣皆無部伍或號曰晉王渡河而北矣日脯晚帝與末帝相失軍無所止河水初解以無舟楫帝泣曰吾兒安在吾王安歸身世盡于斯矣是夜大寒雪深盈尺兵士凍死者衆河水有復合處帝試踐行可渡不旋踵而水解繼行者陷矣是夜帝得渡宿先鋒砦翼日莊宗遣內官訪帝時已獲土山之捷矣軍聲復震

晉高祖後唐應順末自河東改鎮管山承詔詣闕會

少帝失位與數百騎欲奔鄴夜與少帝相遇護嘉東

遂俱入衛郡洎郵舍中時劉諱

卽漢高祖也

從行是夜偵

知少帝伏甲欲與從臣謀害晉高祖詐屏人對語方

坐於亭廡劉諱密遣御史石敢袖鎚立於後伏甲者

俄起左右驚擾敢素有勇力擁晉高祖入一室以巨

木塞門敢力當其鋒尋死焉劉諱乃解所佩刀隔窓

授晉高祖旣出有數卒逐劉諱劉諱時無佩刀遇夜

晦以在地葦炬未燃者奮而擊之人謂其短兵也遂

敗走帝乃匿身長垣下隔垣聞人相告云石太尉已

死矣

卽晉高祖也

劉諱審其語則帝所親驍將李洪信也



劉諱因諱而召之曰石太尉無恙繇是坎垣求出其垣劃然頽落有神助焉劉諱乃與洪信合衆護晉高祖殺建謀者以少主授刺史王引贊晉高祖乃能脫難赴闕

漢高祖卽位初自晉赴雒次絳都有司奏置頓厄口鎮帝曰地名稍惡安可宿之朕記此別有好路乃遣人導之果坦夷而至于聞喜縣有從騎橐駝繇厄口者多爭路墮於絕壑從臣嘆曰昔高皇帝避柏人之名其智若神我帝惡厄口而人聞喜何千載之暗合邪

周太祖初爲漢侍衛馬步軍都指揮使乾祐中圍李守貞于河中府攻城日大風帝祝於河神而風止及守貞將敗帝夢河神告曰勿攻擊七月下旬上帝滅其族果如其言及北征至澶州驛亂軍逼卽登城樓令王峻慰諭之曰河水已解浮橋難立如何南濟衆亦憂之其夜西北風裂凝凍比昧旦津吏報水堅可渡步騎踐冰而行堅如鐵石未午軍人渡絕衆謂之凌橋其日將夕津吏報曰冰橋泮矣

廣順二年五月親征慕容彥超于兗州是月十三日至城下賊尙拒守十七日晝寐夢內養德兒引道士



一人進書卷首云車駕來月二日還京其下文字絕  
多不能盡記既寤以夢示宰臣又四日而城拔六月  
二日離兗州是日大雨城下行營水深數尺其日晚  
至中都縣太祖笑謂侍臣曰今日若不離城下則當  
爲水潦所溺矣

世宗顯德元年三月親征河東大敗賊軍初兩軍之  
未整也風自東北起不便於王師及與賊軍相遇風  
勢斗迴人情相悅

册府元龜



